

# IBRAH



Walaupun hukum syarak membenarkan perkahwinan bawah umur, dalam situasi tertentu kita juga perlu merujuk kepada aspek penafian hak mereka sebagai kanak-kanak”

**Norilyana Dzulkifli,**  
Ahli Majlis Perunding  
Wanita Islam Malaysia



Undang-undang yang digubal tentu sekali untuk menjaga kepentingan masyarakat. Namun jangan sampai ia mengharamkan perkara yang halal hingga masyarakat merasakan untuk melakukan perkara yang halal menjadi hal yang teruk”

**Mohammad Nidzam  
Abdul Kadir,**  
Pensyarah Fakulti  
Ekologi Manusia UPM

## Kawalan jangan sampai haramkan perkara halal

← Dari Ms.73

“Apabila isu ini dibangkitkan, ia adalah dengan izin Allah SWT supaya kita semua kembali kepada prinsip moraliti dan nilai ihsan.

“Ia juga saya lihat satu teguran supaya kita lebih peka dalam menangani kes seumpamanya, terutama berbentuk penganiayaan kepada diri, jiwa dan emosi insan yang lain, apatah lagi kanak-kanak yang dikategorikan sebagai kurang keupayaan untuk menjaga diri apatah lagi bersuara.

“Walaupun hukum syarak membenarkan perkahwinan bawah umur, dalam situasi tertentu kita juga perlu merujuk kepada aspek penafian hak mereka sebagai kanak-kanak untuk mendapat persekitaran yang baik, perlindungan ibu dan ayah dan komuniti serta keperluan utama dalam tumbesaran, iaitu untuk mendapat pendidikan,” katanya.

### Tiada had usia berkahwin

Sementara itu, Pensyarah Fakulti Ekologi Manusia, Universiti Putra Malaysia (UPM) Dr Mohammad Nidzam Abdul Kadir, berkata secara umumnya Islam tidak meletakkan had umur untuk perkahwinan.

Katanya, pernikahan yang cukup syarat atau rukunnya, iaitu ada pengantin lelaki dan pengantin perempuan, wali, dua saksi serta ada majlis ijab dan qabul menjadikan pernikahan itu adalah sah di sisi syarak.

Namun, sebagai negara yang tertakluk kepada Perlembagaan Persekutuan memerlukan masyarakat untuk patuh kepada undang-undang yang digubal bagi memastikan kemaslahatan penduduknya.

“Pada pandangan saya, apabila sudah mencapai usia baligh boleh dianggap sesuai untuk berkahwin.

Namun, kita juga perlu melihat faktor lain kematiangan pengantin, ekonomi dan pendidikan sebelum dibenarkan untuk berkahwin.

“Jadi kebenaran berkahwin pada umur 16 tahun ke atas bagi perempuan dan 18 tahun ke atas bagi lelaki seperti termaktub dalam undang-undang keluarga Islam di kebanyakan negeri itu sudah memadai.

“Bagi pasangan di bawah umur terbabit perlu mendapatkan kebenaran mahkamah,” katanya.

Mohammad Nidzam turut memberikan pandangan terhadap desakan supaya enakmen membabitkan had umur kebenaran berkahwin dinaikkan.

Beliau berkata, tiada masalah sekiranya had umur dinaikkan tetapi undang-undang baharu yang digubal itu perlu dipastikan tidak bertentangan dengan syarak.

“Undang-undang yang digubal tentu sekali untuk menjaga kepentingan masyarakat. Namun jangan sampai ia mengharamkan perkara yang halal hingga masyarakat merasakan untuk melakukan perkara yang halal menjadi hal yang teruk,” katanya.

Mohammad Nidzam berkata, masyarakat dinasihatkan supaya tidak meletakkan pemikiran negatif terhadap perkahwinan di awal usia belasan tahun.

Katanya, ruang diberikan kepada kuasa mahkamah sebagai pihak ketiga dan tidak mempunyai kepentingan dalam membuat pertimbangan terhadap kebenaran perkahwinan bawah umur.

Katanya lagi, kebenaran diberikan untuk berkahwin juga untuk mengelak berlakunya perzinaan.

### 500,000 kes anak tak sah taraf

“Di sini, kita bukan ingin menggalakkan perkahwinan pada usia

## PERKAHWINAN BAWAH UMUR DI MALAYSIA 2010 - 2015



Sumber: Jabatan Kehakiman Shariah Malaysia (JKSM) dan Jabaan Pendaftaran Negara (JPN)

GRAFIK BH

awal. Namun jika sudah mempunyai pasangan dan ingin berkahwin awal, ada ruang yang diberikan dengan kuasa mahkamah.

“Ruang yang ada juga kerana adalah perkara lebih besar, iaitu mengelakkan perzinaan dan kahiran anak tidak sah taraf yang mencatatkan lebih 500,000 anak tidak sah taraf direkodkan dari 2005 hingga 2015.

“Jangan kita menjadi seperti Barat. Walaupun mereka meletakkan had usia perkahwinan 18 tahun ke atas, bebas untuk melakukan hubungan seks yang sama sekali bertentangan dengan agama Islam,” katanya.

Mohammad Nidzam turut menegaskan agar perkahwinan bawah umur yang berlaku pada zaman sekarang tidak disamakan dengan pernikahan Nabi Muham-

mad SAW dengan isterinya, Siti Aisyah RA.

Katanya, perkahwinan Baginda Rasulullah itu berlaku kira-kira 1400 tahun yang lalu. Malah wujud khilaf usia sebenar Siti Aishah ketika bernikah dengan Rasulullah sama ada ketika Siti Aisyah berumur enam tahun atau 14 tahun.


“Kita tidak tahu fizikal dan tubuh badan Siti Aisyah ketika beliau berkahwin dengan Rasulullah SAW.

“Pada zaman itu, tiada undang-undang ataupun perintah Allah menghalang, manakala masyarakat Arab ketika itu juga menerimanya.

“Jadi pernikahan Rasulullah SAW itu tidak boleh dibawa kepada situasi zaman sekarang. Malah ia boleh dianggap sebagai sunnah terpencil untuk diikuti,” katanya.



Hak kanak-kanak, terutama kebijakan dan mendapat pendidikan wajar dilindungi.



Hukum syarak membenarkan perkahwinan bawah umur dengan syarat tertentu.